



棗林外索

曹操

曹操有發丘中郎摸金校尉二官 南齊廢帝子業亦置之領於

建安王休仁山陽王休祐 魏武短歌行何以銷憂惟有杜康註

康字仲寧

銅雀臺

銅雀臺鄴城西北北則水井臺南則金鳳臺三臺相去各六十里
後樓臺俱燬土人掘地得瓦色頗青內平瑩印工人姓名皆八分
隸書研譜云人得此瓦為研貯水數日不涸鄴中記曰北齊起鄴
南城屋瓦皆以胡桃油之光明不癬筒瓦用在覆瓦其背版瓦
用在仰故油其面筒瓦長二尺濶一尺版瓦之長如之而其濶

鹽官談遷孺木輯



今得其真者當油處必有細紋俗曰琴紋有白花曰錫花傳言
當時以黃丹鉛錫和泥積歲久而錫花乃見古磚大者方四尺上
有盤花鳥獸紋千秋萬歲字其紀年非天寶則興和蓋東魏北齊
也又有磚筒者花紋年號如磚內負外方承簷溜亦可為硯鄴人
有言曰銅雀瓦研體質細潤而堅如石不費筆而發墨此古所重
者而今絕無蓋魏去今千有餘年村夫剖土求之聚眾踰年不得
鄴民乃偽造以詔遠方王安石詩曰吹盡西陵歌舞塵當時屋瓦
始稱珍甄陶往一成今手尚託虛名動世人宋刺史李琛嘗言元
豐初於丹陽邵不疑家得唐丙申歲元次山家藏鄴城古磚背有
花紋及萬歲字與鄴中記合又曰大魏興和二年造則唐賢所珍
已出於南矣唐丙申乃天寶末年至琮時二百餘載而硯可用如
新偽瓦之質燥用之不能久火力勝也夫甄陶之物土以為質水
以和之必得火而成火力方勝則土曠而水飽雖有黃丹鉛錫焉
能潤澤哉惟古瓦與磚沒地中數百年感霜露風雨之潤既久火
力已絕復受水氣所以含蓄潤澤而資水發墨也

臨漳縣志

山陽公

魏奉漢獻帝為山陽公居濁鹿城在今懷慶修武縣西北六十里
一名山陽城帝後葬城北人呼漢陵今以名村

疑塚

臨漳縣西十五里隆陽講武城外凡七十二處森然彌望高者如
小山布列直至磁州而止俗曰曹氏疑塚唐蕭冰屋詩安排死去
千家塚刻畫生前一片心安得此心如此塚不教人識到於今俞
應符詩二首生前欺天絕漢統死後欺人設疑塚人生用智死即
休何用餘機到丘壠人言疑塚我不疑我有一法君未知盡發七

十二疑塚必有一塚藏君屍劉溫詩生前詐力蓋中州死後何疑
七十丘他日鼎分重禪繼也須認取漢春秋彭剛詩二章金棺何
處莖奸欺銅雀臺中夜思不作子孫長久計空教百里塚纍纍
西陵千載有餘哀永泰黃時詔正來明日邯鄲城下過分留殘泪
弔叢臺宋王安石詩青山如浪入漳州銅雀臺西八九丘蝼蟻往
還空隴歎麒麟埋沒幾春秋京鏜詩疑塚多留七十餘謀身自謂
永亡虞不知三馬同槽夢曾為兒孫遠慮無孫鉉詩曹瞞疑塚七
十二未必遺骸在此間生自疑人疑不還留疑跡後人看焦維
章詩履塚不計春妓魂曹鬼已成塵就中只有漳河在風浪
於今愁殺人曹操薨鄴城西北曰西隄即高平隄也

崔旣彰德府志曰磁州漳河南北塚纍纍不絕大小殊狀俗曰曹
氏疑塚往者歲荒民盜發塚皆有屍其一為齊高陽王湜墓志見

存

郡人教諭劉瑄曰疑塚之說載在志籍今古一律不辨其偽誠以
訛傳訛昏墮阿瞞計中而不自知其非也瑄生斯地為斯民也一
得之愚歟不昧已非一日茲將就正於有道可乎慨自嘉靖八
年饑饉太甚窮民發墓以就口寶州南諸塚掘發殆盡其間志石
皆北齊高歡皇帝并宗室塚墓申省祭家尚有志刻一張曰王諱
湜字頊達齊王第十三子也王既為齊則塚不可疑一也西陳村
迤西四塚俗曰四牧塚其實齊王之四妹塚也妹既為齊則塚不
當疑二也三里堡南大路西側塚前碑石題曰公主夫額以公主
則塚不必疑三也州之西側大塚俗人呼曰天子塚實則齊王陵
也夫塚為齊王則塚不待疑四也然則古今昏疑而不能白者一
則失於無證而輕於信二則狃於見聞而其明三則老瞞之奸

踪跡詭秘而難於知也蓋操嘗發梁孝王塚破棺收金其心不正
故於已事而過為之防其藏匿諱秘必有人所不知者也觀其遺
命之宮人歌舞銅雀臺上以望吾陵則其言之誠偽屍之在亡未
可諒也是則不知屍之所在固為不疑塚之七十有二果可疑乎
否乎按南史高陽康穆王湜神武第十一子也其第十三子為
華山王凝今志石稱齊王第十三子可訂史之誤

產異

魏景初元年衛國李善家燕生巨鵲若鶯高堂生曰此魏室之大
異防鷹揚之臣於蕭牆之內其後宣帝起遂有魏室按戰國策宋
康王之時有雀生鱗歎於城之隈使史占之曰小而生巨必伯天
下康王大喜於是滅滕伐薛取淮北之地欲霸之速成故射天啓
地斬社稷而焚滅見伐於齊國亡

曹操廟

唐中屠子迪毀夷陵曹操廟

陳琳

陳孔璋居袁裁書則呼操為豺狼在魏製檄則自紹為虺蛇在時
君所命不得自尊然亦文人之巨患也當務從容消息之顏氏家訓

鵲巢非利

魏文帝景初元年凌霄閣始構鵲巢其上帝以問高堂隆對曰詩
云維鵲有巢維鳩居之今興起宮室而鵲來巢此宮室未成身不
得居之象也於是帝改容動色萬曆中平湖陸太宰先祚於

卜宅始立梁巢鵲太宰聞之不懌引詩為券後果如其言

詩調

劉公幹贈五官中郎將詩昔我從元后整駕至南鄉過彼豐沛都

與君共翱翔元后蓋稱曹操也至南鄉謂伐劉表之時豐沛都喻
操譙郡也王仲宣從軍詩云籌策運帷幄一由我望君聖君亦稱
曹操也又曰竊慕負鼎翁願厲朽鈍妾是欲效伊尹負鼎於湯以
伐桀也是時漢帝尚存而二子之言如此一曰元后一曰聖君正
與荀彧比曹操為高光同科或以公幹平視美人為不屈是不為
知人之論 嚴滄浪詩話

鬱林石

吳鬱林太守陸績泛海歸吳舟輕恐覆取巨石為裝績家吳郡婁
門內臨頓里之北石至今存弘治丙辰四月巡按樊祉移於公署
曰廉石亭

妻甥女

孫休朱夫人朱據女休姊公主所生休妻其甥事同漢惠

龍州鄧艾廟

龍州宣撫司東一百七十里有魏將鄧艾廟以伐蜀嘗徑此宋知
州洪咨夔毀其廟更祀諸葛告其民曰毋事仇讐而忘父母
陰平道在陝西守禦軍民千戶所

西山僊童

周末隆慮人喬順二子曰璋曰瑞師事仙人盧子恭於隆慮山棲
霞谷教以清冷之術服飛龍藥十年不飢與師白日飛舉故魏文
詩曰西山何其高高、上無極上有兩僊童不飲亦不食

伯瑜

陳思王靈芝篇伯瑜年七十綵衣以娛親令人但知老萊子之事
而不知伯瑜 因學紀聞

洛神

晉江黃鳳翔曰洛神賦非感甄也寃哉陳思處於危疑顛沛之會
故感甄也天問曰胡羿射夫河伯而妻彼洛濱遠遊賦曰騰告為
鳥迎宓妃植自附屈原而不敢顯語託宋玉也

石人

魏築千秋塢五龍渠立一石人若腹若東西脇皆有記其略曰後
當興工宜就西磧故書之於右以遺後賢古人不忍輕毀故渠并
不欲掩作者之姓名蓋如此

陳健儒太平清話

王祥

諸城縣孝子灣亘四五里清堂不涸嚴冬冰合惟中央二三尺不
冰相傳王祥卧冰處上有祠晉書王祥臨沂人今沂州王祥河一
曰孝河州北二十五里有孝塚西戚溝河孝感泉安慶府望
江縣南二里卧冰池祥嘗自臨沂扶母避地於此人慕而名之然

雖極凍其中有人卧形

郝經續後漢書以王祥為篡臣

管辰序兄輅傳

按辰所稱鄉里劉太常者謂劉實也辰撰輅傳實時為太常穎川
則實弟智也實智並以儒學為名無能言之世語稱寔博辨猶不
足以並裴何之流也又按輅自說云本命在寅則建安十五年生也
至正始九年應三十九而傳云三十六以正元三年卒應四十七
傳云四十八皆為不相應也近有閻續伯者名續該微通物有良
史風為天下補綴遺脫敢以所聞列於篇左皆從受之於大人先
詰足以取信者莫免虛誣之說云爾嘗受辰傳所謂劉太常者曰
輅始見聞由於為隣婦卜亡牛云當在西面窮牆中縣頭上向教
婦人令視諸丘冢中果得牛婦人目以為藏己牛告官按驗乃知

以術知故裴冀州遂聞焉又云路中小人夫妻者輅為卜教使明
旦於東陽城門中伺擔豚人牽與共鬪具如其言豚逸走即共追
之豚入人舍突破主人甕婦從甕中出劉侯曰此類甚多辰所載
總十一二耳劉侯云辰考廉才也中書令史記云龍輅鄉里人云
輅在田舍嘗候遠鄰主人患數失火輅卜教使明日於南陌上伺
當有一角巾諸生駕牛故車必引留為設賓主此能消之即從輅
戒諸生有急求去不聽遂留當宿意大不安以為圖已至人罷入
生乃把刀出門倚兩薪積間側立假寐歎有一小物直來過前如
獸手中持火以口吹之生驚舉刀斫正斷腰視之則狐自此主人
不復有災前長廣太守陳承祐口受城門校尉華長駿語云昔其
父為清河太守時召輅作吏駿與少小後與鄉里遂以恩意常與
同載周旋具知其事云諸要驗三倍於傳辰既短才又年縣小又
多在田舍故益不詳辰仕官至州主簿部從事大康之後物故駿
又云輅卜六不悉中十詩七八駿問其故輅云理無差錯來卜者
或言不足以宣事是故使爾華城門夫人者魏故司空涿郡盧公女
也得疾連年不差華家時居西城下南禮里中三廐在其東南輅
卜當有師從東方來自言能治便聽使之必得其力後亡何有南
征廐駒當克甲卒來詣盧公占能治女郎公即表請留之專使其
子將詣華氏療疾初用散藥後復用丸治尋有效即奏除駒名以
補太醫又云隨輅父在利漕待有治下也民捕鹿者其晨行還見
毛血人取鹿處來詣廐告輅為卦語云此有盜者是汝東巷中第
三家也汝徑往門前伺人無時取一瓦子密發其確屋東頭第七
椽以瓦著下不過明日食時自送還汝其夜盜者父病頭痛壯熱
煩疼然亦未詣輅卜輅為發崇盜者具服輅令擔皮肉藏還著故

處病當自愈乃密教鹿王往取又語使復往如前棄瓦舉椽盜父
亦差又都尉治內史有失物者輅使明晨於寺門外看當逢一人
使指天畫地舉手四向自當得之莫果獲於故處矣

裴松之三國注

衛瓘璧玉

魏咸熙初將軍衛瓘至成都得璧玉卽各一枚又似成信向元聞
之曰吾聞譙周言先王諱備其訓具也後主諱禪其訓授也今中
撫軍名炎與之北牙

羊祜碑

羊祜墮泪碑益州記捷為李賜撰賜家之子

蔡襲

景猷羊皇后蔡邕甥女也羊祜亦邕外孫景猷皇后同產弟祜禦
吳功將進爵乞以賜舅子蔡襲詔封襲關內侯

鄧殷

鄧攸孫殷鍾會代蜀召為主簿終中庶子

劉伶

中說劉伶作劉靈

品官占田

晉平吳後制品官占田之法第一品占五十頃第二品四十五頃
第三品四十頃第四品三十五頃第五品三十頃第六品二十五
頃第七品二十頃第八品十五頃第九品十頃又各以品之高卑
廕其親屬

蒿里

陸機太山吟蒿里立有亭幽岑延萬鬼人死其魂拘于蒿里岑
詩東嶽前後魂北邙新舊骨 華亭黃耳寺以犬得名詩話謂黃

耳非犬也乃童僕名其捷足如犬

阮籍

京師曹氏家藏阮步兵詩一卷唐人所書與世所傳有數十首集中所無其一篇云放心懷寸陰義和將欲冥揮袂撫長劍仰視浮雲行雲間有立鵠抗首揚哀聲一飛冲青天疆世不再鳴安於鷄鷄徒翻、戲中庭又云嘉木下成蹊東園捐鹿李秋風吹飛藿零落從此始繁 有憔悴堂上有荆杞驅馬舍之去去上西山趾一身不自保况復惡妻子凝霜被野草歲暮云云已詩語皆類此非後人作明矣孔宗翰亦有本與此多同 詩紀

洛陽舊火

元帝渡江洛陽人王離妻李氏將洛陽舊火南渡自言受道祖母王氏傳此火并有遺書二十七卷臨終使行此火勿令斷絕火色甚赤異於四方病者將此火煮藥及灸諸病皆愈轉相妖惑官司禁不能止及李氏卒火亦滅人號其居曰聖火巷按古者五時取五木以改火使民不疾洛陽之火必出於异木自能蠲疴非必妖惑也 馮時可集

嵇康

裴松之曰按本傳云康以景元中坐事誅而干寶孫寶習鑿齒諸書皆云正元二年司馬文王反自樂嘉殺嵇康呂安蓋緣世語云康欲舉兵應母丘儉故謂破儉便應殺康也其實不然山濤為選官欲舉康自代康書告絕事之明審者也按濤行狀濤始以景元二年除吏部郎耳景元與正元相去七八年以濤行狀檢之如本傳為審又鍾會傳云會作司隸校尉時詳會作司隸景元中也 嵇康無鬼論 唐莆田林披茂則以明經擢第授臨汀郡曹掾

郡多山鬼瑤祠披著無鬼論晚民

李氏六龍

李密令伯六子皆英雄秀逸號六龍

葛洪

葛洪嘗拜伏波將軍見莊綽辨疑

韓壽

陳騫以韓壽為掾每會聞有异香乃外國所貢騫計武帝惟賜已嫌壽與女通乃以女妻壽郭子謂賈充女者訛也

鍾離權

大將軍周處西征鍾離權充偏將軍處戰亡兵潰權隱山學道以

仙名焉

神仙通鑑

郭璞

嘉定州烏龍山下傳晉郭璞注爾雅於山有爾雅臺注成洗研於江江魚吞之盡黑至今稱黑頭魚每年春日魚出清明日止其味甚佳

博物志

張華博物志唐人殷文圭云華原書四百卷晉武帝刪為十卷

綠珠

綠珠梧州博白縣西濶角山下梁氏女梁氏之居舊井存焉汲飲者必誕美女里閭以為亡益遂鎮以巨石 太平廣記

秦女休

左延年秦女休行記時事也女休年十四五為燕王婦為宗報仇殺人都市竟以赦宥得免

桃葉歌

桃葉王猷之愛妾也其妹曰桃根詞曰桃葉復桃葉花葉連根

毛寶放龜

搜神記載豫州刺史毛寶戍邾城有一軍人於武昌市見人賣一白龜子長四五寸潔白可愛便買配持歸著甕中養之漸大至尺許軍人憐之持放江中後石季龍攻邾城毛寶棄豫州既赴江舟皆沉溺軍人亦墮水覺在一石上水裁至腰頃史浮出中流視之乃是先所養白龜可六七尺送至東岸出頭視此人徐游而去幽異錄載亦同乃白氏六帖引搜神記直以為寶放龜而合璧諸書俱相承爾雅翼以毛寶過江白龜載之而度為异皆訛也晉書本傳邾城之役毛寶溺死庾亮痛哭發疾遂薨王隱晉書曰邾城陷寶屍沉江不出戴祥移告河伯諸神使出寶屍十餘日乃出則知搜神記所言事繫軍人為不爽

藝海詞酌

張翰秋風歌

秋風起兮佳景時吳江水兮鱸魚肥
三千里外家未歸恨難得兮仰天悲

梅賾增書

元帝時豫章內史梅賾增伏生書二十五篇原二十八篇

梁山伯

梁山伯字處仁家會稽游學道逢祝氏子同往肄學三年祝先返後二年山伯方歸訪之上虞始知祝女子也名英臺山伯悵然歸告父母求姻而祝氏已許鄞城馬氏弗遂山伯後為鄞令死葬鄞城西清道原明年祝適馬氏過其墓風濤不能前英臺聞有山伯墓臨塚哀慟地裂而埋壁為事聞於朝丞相謝安奏封義婦塚

寧波府志

鄞縣東十六里接待寺西祀梁山伯號忠義王廟

衛夫人

衛夫人名鏐字茂漪晉汝陰太守李矩妻善鍾法能正書入妙王逸少師之翰墨誌

黃鵠

石虎時揚州獻黃鵠鷓五頭長一丈殺濶十里許泛於玄武苑中玄武池化為玄龜水經

莫愁

莫愁石城女子非石頭城也石城在古復州鄞中今之承天府是也且與襄陽估客同為一事五雜俎

王羲之

大城縣城西五里餘王相村古墓居民竊啟見五色石槲上有王

羲之字速掩之

蘭亭

唐何延之記蘭亭四十有一人內有支道林宋李龍眠作圖除去亦不損前數又不知今所增一人為誰也顧璘息園存稿

鳩摩羅什

鳩摩羅什但能精通術數博極群書僧中之子雲茂先也謂之成佛作祖吾則未敢什父羅炎修行不遂為禁鬱所逼已墮落矣至什而復蹈其轍焉雖曰彼福亦由欲障未除升座講經之際二兒登肩神識未定鬼瞰之矣既生二子何患法種亡嗣妓女十人之畜不亦可以已乎臨終之時誦神呪自救未及致力轉覺危殆其處死生之際非能脫然無罣碍者尚在安佛圈澄之後乎謝肇淞

謝安別墅

褚叔度請謝安別墅為寺

兩戲馬臺

劉澄之山川古今志彭城西南有戲馬臺劉裕九日所登水經注石席每講武于漳水上即升臺以望之

許真君

神仙之跡未有如許氏之盛而亦未有如許氏之不相蒙者陶貞白極重真誥真誥稱許穆與兄揆次兄虎牙子玉斧門客楊羲俱為仙官而義穆最貴中有許邁與穆二書貞白所著許長史碑穆世名謚仕至護軍長史散騎常侍得道卒年七十二揆世名毗席牙名睽皆得道又云第四兄字遠游永和四年嘉遁不返然不言得道晉書許邁傳字叔玄一名快句容人後云玄字遠游與王右軍善遊名山不知所終好道者謂之羽化然不為謚作傳亦不及

其仙事而今世所崇奉許真君者名遜據列仙傳為遠游弟嘗與郭景純俱參王敦軍切諫景純解兵而真君隱去以陰功重仙品最高為九天採訪使真誥又略不及晉史既非隱書真誥亦非真文貞白與真君俱赫然朗著何以不相及也右軍有玄度腫至一帖黃長睿楊用修遂引以駁晉史謂玄度寔病死乃云服巨勝仙去不知玄度乃許詢非邁也續晉陽秋曰詢字玄度高陽人風情簡素辟司徒掾不就早卒世說盛稱之晉史不為詢作傳僅附孫綽傳亦無服巨勝語此皆不可曉者按史以載事仙釋出世業在事外非可以示民故以佛因澄羅什之神僧而僅列之於藝術况羽化尸解茫昧難徵者乎晉書之不詳許氏也奚怪真誥雖曰真文然所志神仙官職太涉於有似巫覡之談亦胡可據以為寔際王世貞危言

許真君傳晉書不載其仙跡甚著初生南昌母夫人夢金鳳啣珠墜掌中既長博學多通聞西安吳猛得至人丁義神方乃師之太康元年為西蜀旌陽令治行甚著以世亂弃官歸邑民隨至宅改氏族以從者甚衆號許家營焉與吳猛游嵩陽聞丹陽黃堂靖有女師謀姆多道術同往叩姆曰昔孝弟王自上清降曲阜蘭公家謂蘭曰後晉代當有許遜傳吾道留金丹寶經與我俟子有年遂擇日設壇授之謂吳猛君當反師許也姆曰取香茅一根南向擲曰子歸認茅路處立吾祠歲秋可一至二君還得飛茅迹於所居南四十里已叢生矣乃建黃堂祠真君渡小蜀江抵肆主人朱氏貧而甚恭真君畫一松于壁其家遂倍得利後江漲潰隄市舍俱漂惟松壁不壞嘗云吾仙去後一千二百四十年間豫章之境五陵之內當此地仙八百江心忽生沙洲掩過沙井口其時也真君弟

子數百志趣不一乃化炭為美婦人試之不染汚者惟十人爾真君歸郡有美少年通謁既去謂弟子茲非人老蛟精也迹其所之遽化黃牛臨郡城沙磧上真君剪紙化黑牛往關令施岑持劍俟其關酣揮之中其左股牛奔城南井中復化為人初蛟慕賈玉女化少年入賈玉家玉大愛其才曰贅為婿居數歲生二子常以春夏獨出若嘗賈者至秋重載歸寶貨充溢蓋覆舟所獲也是秋徒還詔玉云為盜傷左股玉歎惋求醫真君乃為醫謁玉玉喜召其婿蛟精懼遂匿真君隨至其堂厲聲叱之乃見本形蜿蜒堂下二子皆為小蛟併斬之賈女亦幾变形真君給以真符乃免謂玉曰蛟精所居下皆洪波也亟遷高原其宅不日陷為澤真君復還豫章曰此地蛟螭所穴須鎮之乃於城南鑄鐵為柱出井外數尺下施八索鈎鎖地脈祝之曰鐵柱若亞其妖再興吾當復出鐵柱

若正其妖永除由是屏跡王敦舉兵內向真君同吳猛往說止之
敦怒真君乃舉杯擲起化為白鶴敦方舉目已失二君所在至孝
武寧康二年甲戌八月朔日上昇年一百三十六歲嘗謂星下散
為物人上昇為仙一氣推移不足為怪即道家所藏真君昇舉事
抑何疊々至其教人惟以忠孝廉謹寬裕容忍為八寶與吾道何
殊記曰清明在躬志氣如神天降時雨山川出雲人心湛然無滓
即太虛六渡何遠豈必談鉛設汞吾讀真君傳有悟曰錄其最異
者又道家載旌陽得道後帝贈其遠祖許由玉虛僕射曾祖琰太
微兵衛大夫祖王太極把業錄籍典者又肅中岳仙官嗟乎武仲
逃免後復有此贈未知復逃避否此與板完事恐盡出附會未可
遽以為實也馮時可藝海洞酌
許旌陽問道於女師謔曰一念不欺為忠一事不苟為孝

孫恩裔黨

晉末妖賊孫恩作亂於會稽宋高祖劉裕為司馬討敗之恩於臨
海投水死眾推恩妹夫盧循為主後劉裕破循于東陽循奔永嘉
復追破之追討至于晉安循浮海南走晉末雖滅遺種逃散居
山海厥類尚繁唐武德八年都督王義童遣使招撫得其首領周
造麥細陵等並授騎都尉令相統捍不為寇盜貞觀十年始輸半
課其居止常在船上兼結廬海畔隨時移徙不常船後尾尖高當
中平濶衝波逆浪都無畏懼名曰鳥船閩書
寰宇風俗記泉郡即此州夷戶亦曰游艇子

桃源漁人

桃源漁人姓黃名道真

陶潛

陶潛潯陽柴桑人柴桑今德化縣之楚城鄉也楚城鄉西南八十里正德九年提學副使李夢陽詩斷碑曰晉陶靖節先生故里始得其墓而陽山上京粟里西廬等處相去直三十里

有作陶淵明詩跋尾者言淵明讀山海經詩形失無千歲猛志固五字皆錯形天是刑天無千歲是舞千戚耳傳者誤謬如此不可不察也竹坡詩話

陶潛不仕宋所著詩文俱書甲子韓偓不仕梁所著詩文亦書甲子偓節行如潛而詩綺靡蓋所養不及身薛西原曰立節行易養性情難謝榛

柴桑令

劉道民曾為柴桑令非陶淵明也

外孫記外祖遺事

外孫記外祖遺事者陶淵明蘓子瞻朱元晦元俞好問

慧遠

耶舍與遠公會嘗舉如意無言以示遠遠不悟即拂衣去徑上紫霄峰是時禪學未入中國而北則見於此矣王禕廬山記

白蓮社

廬山蓮社十八賢慧遠法師姓賈氏廬門樓煩人慧永姓繁氏河內人慧持遠公弟也與兄同事道安道生姓魏氏巨野人客居彭城佛院耶舍尊者罽賓國婆羅門種佛陀跋陀羅尊者甘露飯王之裔慧叡冀州人曇順黃人道敬瑯琊王氏隨祖凝之守江州曇恒河東人曇昺姓陳氏潁州人曇詵廣陵人劉道民名程之字仲思彭城聚里人漢楚元王之後雷次宗字仲倫南昌人宗炳字

少文南陽人官任太子舍人張野字萊民官任治中張詮字秀碩
張野族周續之字道祖鴈門廣武人

慧遠年八十四晉義熙十三年秋八月六日見謝靈運諫序

王禕曰慧遠卒於晉義熙十二年丙辰年八十三陸修靜沒於宋
元徽五年丙辰年七十二丙辰相去六十載推而上之修靜生義

熙四年丁未慧遠亡時修靜才十歲爾至宋元嘉末修靜始來廬
山時遠公亡且三十年靖節死亦二十餘年矣安取所謂三笑乎

或曰晉蓋有兩修靜也宋濂跋匡廬社圖十八賢道士陸修靜法

師慧遠陶元亮畢穎之遠公弟慧持僧跋陀宗少文僧曇順劉程

之雷仲倫周道祖餘忘之劉程之蓮社文云歲在栴提格七月戊

辰朔二十八日乙未慧遠命正信之士豫章次宗等百有二十三

人集於廬山般若臺精舍修西方淨土之學今所畫止十八人取

著名於時者也

西夷上表

常勝天子陛下諸佛世尊常樂安隱三達六通為世間道是名如

來應供正覺遺形舍利造諸塔像莊嚴國土如須彌山村邑聚落

次第羅匝城郭館宇如忉利天宮宮殿高廣樓閣莊嚴四兵具足

能伏怨敵國土豐樂無諸患難奉承先生正法治化人民良善慶

無不利處雪山陰雪水流注百川洋溢八味清淨周匝屈曲順趨

大海一切衆生成得受用於諸國土殊勝第一是名震旦大宋揚

都承嗣常勝大王之業德合天心仁應四海聖智周備化無不順

雖人是天護世降生功德寶藏大悲救世為我尊主常勝天子是

故至誠五体敬祀呵羅單國王毗沙跋摩稽首問訊

宋文帝元嘉十年

大吉天下且下離淫怒癡哀憇群生想好具足天龍神等恭敬供

養世尊威德身光明照如水中月如日初間自蒙普照十方其
白如雪亦如月光清淨如華顏色光耀威儀殊勝諸天龍神之所
恭敬以正法寶梵行衆僧在嚴國土人民熾盛安隱快樂城閣高
峻如乳他山衆多勇士守護此城閣莊嚴道巷平正著種衣猶
如天服于一切國為最殊勝吉揚州城無憂天主慈念群生安樂
民人律儀清淨慈化深廣正法始化供養三寶名稱遠至一切並
聞民人樂見如月初生辟如梵王世界之主一切人天恭敬作禮
呵羅單跋摩以頂禮足猶如現前以體布地如殿陛道供養恭敬
如奉世尊以頂着地曲躬問訊忝承先業嘉慶無量忽為惡子所
見爭奪遂失本國今唯一心歸誠天子以自存命今遣毗紐問訊
大家意欲自往歸誠宣訴復畏大海風波不達今命得存亦由毗
紐此人忠志其思難報此是大家國今為惡子所奪而見驅擯意

頗忿惋規欲雪復伏願大家聽毗紐買諸鎧仗袍襖及馬願為料
理毗紐使時還前遣闍邪仙婆羅呵蒙大家原賜悉惡子奪去
啓大家使知今奉薄獻願垂納受
元嘉十三年

宋國大主大吉天子呈下敬禮一切種智安隱天人師降伏四魔
成等正覺轉尊法輪度脫衆生教化已周入于涅槃舍利流布起
無量塔衆寶莊嚴如須弥山經法流布如日照明無量淨僧猶如
列宿國界廣大民人衆多宮殿城郭如忉利天宮名大家揚州大
國大吉天子安處其中紹繼先聖王有四海闡浮提內莫不來服
悉以茲水普飲一切我雖在遠亦需靈潤是以雖隔巨海常遙臣
屬願照至誠垂哀納受若蒙聽許當年遣信若有所須惟命是獻
伏願信受不生异想今遣使至佛大陀婆副使葛抵奉宣微誠稽
首敬禮大吉天子呈下陀婆所啓願見信受諸有所請惟願賜聽

今奉微物以表微心 元嘉十二年閏婆達國王師黎婆達陀阿羅跋摩

伏聞彼國據江傍海山川周固衆妙悉備莊嚴清淨猶如化城宮

殿莊嚴街巷平坦人民充滿歡娛安樂聖王出游四海隨從聖明

仁愛不害衆生萬邦歸仰國富如海國中衆生奉順正法文王仁

聖化之以道慈施衆生無所遺惜帝修淨戒軌道不及無上法瓶

濟諸沉溺群僚百官受樂無怨諸天擁護萬神侍衛天魔降伏莫

不歸化王身莊嚴如日初出仁澤普潤福如大雪聖賢承業如日

月天於彼真丹寂為殊勝臣之所住名迦毗河東際于海其城四

邊悉紫紺石首羅天護令國安隱國王相承未嘗斷絕國中人民

率皆修善諸國未集共遵道法諸寺舍中皆七寶形像衆妙供具

如先王法臣自修檢不犯道禁臣名月愛棄世王種惟願大王聖

體和善群臣百官悉自安隱今以此國群臣吏民山川珍寶一切

歸屬五體投誠大王足下山海遐隔無由朝覲宗仰之至遣使下

承使王父名天魔悉達使王名尼陀達此人由來良善忠信是故

今遣奉使表誠大王若有所須珍奇異物悉當奉送此之境土便

是王國王之法令治國善道悉當承用願二國信使往來不絕比

反使還願賜一使具宣聖命備勅所宜款至之誠望不空反所白

如是願加哀慈奉獻金剛指環摩勒金環諸寶物赤白鸚鵡各一

頭 元嘉五年天竺迦毗黎國王月愛

右諸表俱文帝元嘉間頗似梵夾蓋涵濡象教語輒相類隋唐以

來漸被華風譯使紛沓遂隔前製又趙宋元豐四年于闐國上表

稱于闐國倭大福力量知文法黑汗王書與東方日出處大世界

田地至漢家阿舅大官家政和 年進玉表云日出東方赫々大
光照見西方五百里國五百里國內條貫至黑汗王表上日出東

方赫、大光照見四天下四天下條貫主阿舅大官家其可笑如此
沈慶之書

南宋沈慶之與兄書登北邙遠眺衆美都盡先武墳遺石甚美今
送其核

橋去洛陽宮六七里悉用大石下負以通水可受大船過也制作
奇狀沿水道路本好青槐映蔭可賞

千金隄舊堰穀水魏時更修謂之千金塢

陸雲臺上有幽井望之幽然投一石子擲之久方聞聲

石徑大都其碑高丈一許廣四尺駢羅相接

鮑照

宋子京筆記云今人多誤鮑照為鮑昭李商隱有詩云濃烹鮑照
葵又金陵人得地中石刻作鮑照字潘子真詩話云景文殊不知

武后時諱照唐人因以昭名之事具昭祠堂記

井錦

南齊時荊州城東天子井出錦於時士女取用與常錦不異經月
乃歇 吳均齊春秋

齊梁紀錄並云出自蕭何又編御史大夫望之以為先祖之次按何
及望之於漢俱為勲德而望之本傳不有此陳齊典所書便乖實
錄近秘書監顏師古博攷經籍注解漢書已正其非今隨而改削

水貢

湘鄉縣內薊泉井氣如椒蘭釀酒殊勝若合以他水則發南齊時
有水貢民以為病罷之立浮屠其上

州民

孔稚圭答蕭司徒書其一云十一月二十九日州民御史中丞孔

稚圭啟云云州民即今治生也

沈麟士抄書

武康沈麟士好學織簾有書數千卷燬於火時年踰八十手自抄
寫火下細書復成三千卷

玉兒玉奴

潘淑妃名玉兒唐楊貴妃名玉奴蘓子瞻詩玉奴終不負東昏

鍾山壙銘

梁任昉大同四年七月於鍾山壙中得銘曰龜言土著言水旬服
黃鍾啟靈址瘞在三上庚墮遇七十已六千三百訣辰交二九重
三四百地當時莫能辨者昉之五世孫升之以授鄭欽詵乃悟卜
完者庚葬之歲月日辰而識其墓地殆無一字闕設又毫厘不差
也沈作詰寓簡

昭明太子墓

昭明太子塋池州秀山門外銅陵天啟乙丑五月貴池孝夢韓君
理夢告以侵地卒未赴銅陵教諭又屬夢遂復之

餘暎

梁元帝纂要云日在午曰亭在未曰暎王仲宣詩山岡有餘暎謂
日仄也譚苑醍醐

陶籍

陶弘景子籍善詩為錢塘令政化如神

後梁春秋

江陵蔡允恭著後梁春秋十卷

明海鹽姚士舜著後梁春秋

白鼠

北魏宣武帝恪洛陽縣獲白鼠散騎常侍兼尚書盧昶按瑞典外
鎮刺史二千石令長木祇上命刻暴百姓人民怨嗟則白鼠至因
上表諫

白樓

朔州舊城內東北白樓郡志云後魏納後秦姚興之女建此望故
國飾以鉛粉故名

後魏諫

後魏時青州俗黨薄京師謠曰獄中無繫囚舍內無青州假令家
道惡腸中不懷愁

後魏石像

大同府城舍和坊遠建華嚴寺奉安諸帝石像五銅像六內一銅
像袈裟垂足而坐餘皆常服

地下受歲

後魏崔誦死十二年為沙門發墓而活言死時年十五今乃二十
七是死仍受歲也塔寺記

劉晝

東魏劉晝孔昭上高歡書曰尼與優婆夷寔是僧之妻妾損胎殺
子其狀難言今僧尼二百萬并俗女向有四百餘萬六月一損胎
如是則年族二百萬戶矣驗此佛是疫胎之鬼也

張澹

西魏征南將軍鄴州張澹塚在冠軍故城有碑刻其背文曰白楸
之棺易朽之裳銅鉄不入凡器不藏嗟爾後人幸勿我傷宋元嘉
中為盜所發獲金銀器甚多原曾魏今悞西魏

木蘭

黃州黃陂縣 隋木蘭縣 北七十里木蘭山有木蘭將軍塚廟曰忠

烈將軍蓋朱氏女代父西征 又歸德府城東南八十里有孝烈

將軍廟 完縣東孝烈將軍廟云木蘭女當代父戍守於此唐封

為孝烈將軍 一統志 木蘭西漢時人從征十八年帝聞其事詔

納宮中蘭不從乃自經死帝驚憫贈將軍謚孝烈見馮時可木蘭

將軍贊 一云木蘭姓魏亮之譙人廟於歲四月八日蓋其生辰

也 嚴滄浪曰木蘭歌朔氣傳金柝寒光照鐵衣酷似太白非漢

魏人語左舜齋曰況有可汗大點兵之句乃唐人無疑魏大武時

柔然已號可汗非始於唐也 通篇較之太白殊不相類 詩家直說

嚴滄浪詩話木蘭歌又苑英華直作常元甫名字郭茂倩樂府有

西篇其後篇乃元甫所作也

晉末僭亂

趙劉元海據平陽三主二十五年 後趙石勒都襄國六主三十

二年 燕慕容皝都薊遷鄴三主三十四年 秦苻堅都長安五

主四十四年 後秦姚萇都長安三主三十四年 南燕慕容德

據廣固二主十二年 南涼禿髮烏姑據樂都遷西平三主十九

年 北涼沮渠蒙遜據姑臧二主三十九年 西秦乞伏國仁據

苑川遷金城四主四十六年 後燕慕容垂據中山鄴四主二十

五年 夏赫連勃勃據朔方三主二十五年 後魏拓拔氏改姓

元都雲中遷洛十六帝一百七十一年 北齊高氏都鄴五主二

十七年 周宇文氏都長安五主二十六年

仙隱趙逸曰自永嘉以來二百餘年建國稱王者十有六君皆游

其都邑自擊其事國滅之後觀其史書皆非實錄 加藍記

前漢

于兢大唐傳湖州德清縣南前溪村則南朝集樂之處今尚有數
百家習音樂江南教伎多自此出所謂舞出前溪者也復齋漫錄
言陳劉剛詩山邊歌落日池上舞前溪唐崔顥詩舞愛前溪綠歌
翻子夜長按智匠古今樂錄晉車騎將軍沈玩作前溪歌而非舞
也蓋復齋不曾見于兢大唐傳故不知舞出前溪耳
漁隱業話歌舞以地著猶今曲之尚海鹽腔也元澈浦楊氏官提
舉家僅教百指教以新聲傾聽一時 明初楊氏生法成雲南梨
園祖其教不衰亦前溪之例也

中說元經

又中子謂文士之行可見謝靈運小人哉其文傲君子則謹沈休
文小人哉其文治君子則典鮑昭江淹古之狷者也其文急以怨
吳筠孔珪古之狂者也其文怪以怒謝莊王融古之纖人也其文
碎徐陵庾信古之夸人也其文誕或問孝綽兄弟子曰鄙人也其
文淫或問相東王兄弟子曰貪人也其文繁謝朓淺人也其文捷
江總詭人也其文虛予謂顏延之王儉任昉有君子之心焉其文
約以則

元經天子之史也書帝正月非也 程子微言

元經始帝晉卒授魏明天命之有在晉宋齊梁陳亡哀中國之無
人卓然於明道而其書不傳今元經存殊駁野蓋偽書 函史

墨蹟

五代陳世祖時征北軍人於丹徒盜發晉郝曇墓大獲晉右將軍
王羲之書及諸名賢遺跡事覺其書並沒縣官藏於秘府世祖以
子伯茂好古多以賜之

陳後太子

福建永春縣陳巖山王應廟祀威應侯陳後主叔寶三人長曰鏡
臺翁季曰易簡為御史中丞侯居中名不傳少習兵法為時豪征
南越擊醜虜有功隋既平陳侯兄弟三人引兵南奔據桃林塲之
肥湖後隋帝有旨令鏡臺釋兵命有司四時祭其父祖其編籍為
民與其兄弟分居三所鏡臺翁居肥湖之瑞峰易簡居慕仁里溪
西而侯隱東巖峭峰歲時挈鞍秣馬往還桃源間一夕憩桃源驛
東偏留弓劍沒後屠著靈應鄉民即地祀之按陳書後主二十二
男皇太子深會稽王莊吳興王胤南平王嶷永嘉王彥邵陵王琑
南海王虔錢塘王恬信義王祗東陽王恮吳郡王藩餘子十一人
總觀明綱統冲洽縮綽威辨並未及封其所封諸王無一征南粵
擊醜虜者且俱從入閩安得南閩而潛之也前見閩書頗異傳疑
可也

景陽井銘

隋煬帝景陽井銘曰前車已覆後乘將沒

鼓山神鉦

武安縣南三十里鼓山上有二石如鼓形世傳鳴則兵起故名神
鉦高齋之末此鼓鳴齋亡隋末鼓聲聞數百里隋亡又云中有竹
林寺五百羅漢所居隱而不見按齊志云文宣帝天保末常使人
往此寺取經函使者辭以不知帝曰卿取我駱駝乘之則自至矣
使者如山果見一寺寺門有數僧相謂曰高洋駱駝來也問使者
曰爾天子使汝來何求曰帝命於市東郭寺從北第一房取經函及
尺八黃帕等僧共取與之後不復見至今山中居人時有聞其鐘
磬及聞梵音者然皆莫知其處帝嘗自鄴都詣晉陽往來山下故
起離宮以備巡幸於此山腹見數百聖僧行道遂開三石室刻諸

尊像曰建寺名石窟今常樂寺也見金宣奉大夫刑部尚書胡勵
記中

石經

石經大學是魏政和中詔諸儒虞松等考正五經刻之於石而大
學中庸行焉松表述賈逵之言曰孔伋窮居於宋懼先聖之學不
明而帝王之道墜故作大學以經之中庸以緯之則學庸皆子思
所作至唐定十三經註疏多妄為改竄今人不見石經遂以唐為
古本其實非也明皇最穿鑿既亂大學次序又刪去顏淵問仁五
句孝經刪去閨門一章洪範上改頤改字嘗見明皇老子注云我
獨異於人而貴求食于母原無求於二字朕所加也蓋其妄每
如此

焦澹園集

佛圖戶

魏獻文帝皇興三年令罪民及官奴為佛圖戶魏徙青齊民於平
城桑乾僧曇曜奏其民有能輸粟六十斛入僧曹者即為僧祇戶
粟為僧祇粟備凶歲饑民又請民犯重罪及官奴為佛圖戶供諸
寺洒掃並許之

七聲

周武帝時龜慈人曰蘓祇婆後突厥皇后入朝善胡琵琶聽其所
奏一均之中間有七聲一曰娑陀力華言平聲即宮聲也二曰雞
識華言長聲即商聲也三曰沙識華言質直聲即角聲也四曰
沙侯加濫華言應聲即徵聲也五曰沙臘華言應和聲即徵聲
也六曰般瞻華言五聲即羽聲也七曰侯利建華言斛牛聲即友
宮聲也譯曰習而彈之始得七聲之正

智者大師

智者大師書陀羅尼經四卷存天台山大慈寺後傳於慧明寺在
東北六十里宋時亡失僅留其一嘉靖間為兵憲譚綸取去今所存是
宋元通法師補書者

白王

會稽山土神白王云隋煬帝子封於白故名響王

丁峴

陳丁峴善書與智永齋名時謂丁真永草

隋隄

河間寧津縣北三十五里隋隄云隋煬帝巡遊駐蹕於此令軍士
築隄如垣有居民耿姓守道守義者進膳帝嘉之因以築隄賜名
耿村土民或稱隋隄又稱耿家園

補隋忠臣

義寧二年泉州守洛陽歐陽佑官滿西歸至邵陽聞隋亡挈家自
溺大乾山河中土人殮葬之邵人祠祀焉

宗室世系

唐書歐陽修宗室世系表云李氏出自嬴姓帝顓頊高陽氏生大
業大業生女華女華生皋陶字庭堅為唐大理生益益生思成歷
夏商周為大理以官命族談遷曰益為皋陶子昔人嘗辨之矣

秦王山

豐潤縣東北二十里有山名不傳高可三里許無他木惟荆叢生
世稱唐太宗為秦王時東征凱旋登山見荆乃愕然曰此吾師曩
時教我朴地遂下馬拜之荆首皆下垂如人俯伏狀至今猶然石
上有秦王下馬跡因名秦王山

牛口塔

臨城縣西二十五里牛口峪昔有童謠曰竇入牛口勢不得久竇
建德為唐兵所破走至此果被擒

高識傳

唐初傅奕集晉魏以來闢佛者作高識傳

避諱

唐太宗諱世民偏傍犯如葉字作葉字泯字作泯字

劉黑闥

劉黑闥卜種植得九五飛龍卦以反叛至於誅僂其時解者曰飛
龍指唐太宗也明主高陽氏人力耕供上即為利見大人之象黑
闥不知自取冥行之凶

薛仁果

薛仁果本薛仁果唐史誤以果為杲見歐陽詢所書御製六馬贊

云鴈白蹄烏平薛仁果時乘

入閣儀

唐有大內又有大明宮在大內之東北世謂之東內高宗以後天
子多在大明宮之正南門曰丹鳳門門內第一殿曰含元殿大朝
會則御之第二殿曰宣政殿謂之正衙朔望大冊封則御之第三
殿曰紫宸殿謂之上閣六曰內衙隻日常朝則御之天子坐朝須
立仗於正衙殿或乘輿正御紫宸即喚仗自宣政殿西門入是謂
東西閣門也以本朝宮殿視之宣德門唐丹鳳門也大慶殿唐含
元殿也文德殿唐宣政殿也紫宸殿唐紫宸殿也今欲求入閣本
意施於儀典須先立仗文德殿廷如天子正御紫宸即喚仗自東
西閣門入如此則差與舊儀合但今之諸殿比於唐制南北不相
對爾又按唐自中葉以還曩日及非時大臣奏事別開延英殿若

今假日御崇和延和是也乃知唐制每御坐朝日即為入閣其後
正衙立仗因而遂廢甚非禮也宋恭知政事宋庠奏議

朝元閣

唐詩朝元閣上西風急都入長楊作雨散喬禮書希大字為太常
少卿祀西岳為予言親歷其地有楊數株猶在閣基之西非宮名
也張志惇南園漫錄

鑄錢郡字

武德中鑄開元通寶錢錢有益字則成益所鑄有潤字則丹陽所
鑄餘做此

直棘

魏鄭公徵狄梁公仁傑張燕公說墓棘直不岐共以為異陳師道
後山談業

龍毛

雒縣寺塔為龍所護側有三池莫測淺深三龍居之入莫能臨視
貞觀十三年三龍大鬪雷霆震擊水火交飛久之乃息人皆拾得
龍毛長三尺許黃赤可愛毛一作鬚佛藏梵字函

袁天綱題石

方士袁天綱見閬州錦屏山題其石曰此山磨滅英靈乃絕

麻姑

麻姑姓黎字瓊仙唐放出宮人也耕餘雜錄

諸陵

高祖獻陵三原縣東北十八里陪葬諸王十六公主一切臣六
太宗昭陵醴泉縣九峻山陪葬諸王七公主二十一妃嬪八諸臣
墓宰相房玄齡杜如晦魏徵馬周岑文本崔敦禮李勣李靖溫彥

傳蕭瑀高士廉長孫無忌許敬宗十三人三品丞郎唐儉姜晦李
大亮虞世南杜正倫姚思廉褚亮薛收馬載段倫張復胤孔志亮
閻立本房仁裕竇庭蘭盧貞松裴藝李珍等五十三人功臣大將
阿史那思尉遲敬德秦叔寶周護仁等六十四人
高宗乾陵乾州西北五里梁山與武后合陪葬太子二諸王三公
主一 中宗定陵富平縣西北十五里龍泉山陪葬太子一公主
五 睿宗橋陵蒲城縣豐山陪葬太子三公主三 讓帝惠陵蒲
城北十五里陪葬諸王三公主三 玄宗泰陵蒲城金粟山
肅宗建陵乾州武將山陪葬郭子儀

尉遲敬德城滁州

唐初修滁州子城及西水關 明胡松嘗行視其下見其石上有
尉遲敬德監造數字敬德傳不云有事于滁而石上云：要之

不誣

高宗論史

顯慶中令狐德棻劉胤之撰國史許敬宗復加叙次帝恨敬宗所
記失寔命宰相刊正且曰朕昔從事未央宮辟伏既過有橫刀伏
草中者先帝歛轡卻謂朕曰事發當死者數十人汝可命出之史
臣惟叙此為寔郝處俊曰先帝仁恩溥將如此類非一臣之弟慶傑
被擇供奉時有三衛悞拂御衣者惧甚先帝曰左右無御史我不汝罪
帝曰此史臣應載處俊乃表左史李仁寔刪整偽辭會仁寔死而止

木葉遼陽

沈佺期詩九月寒砧催木葉十年征戍憶遼陽木葉地名或曰下
葉亦地名按遼史歲幸木葉山則非下葉也

花黃果黃

槐花黃舉子忙 枇杷黃醫者忙 橘子黃醫者藏 續世說

章懷太子墓

武后忘太子廢為庶人從巴州使呂神積逼令自殺墓銘曰斷一指得天下凡人不可為殺愛子竊帝位武后行之噫嘻賢之遺隧萬世之元龜

李龍遷墓

四川龍州宣撫司東南百五十里牛心山昔李龍遷墓於山側唐武氏革命鑿斷山脉水赤如血玄宗幸蜀有老人蕪坦奏龍州牛心山國之祖墓今日蒙塵之禍乃則天掘鑿所致玄宗即命刺史修填如舊未幾誅祿山乃陞州為都督府賜號靈應郡

狼山都督府

高宗永徽元年立狼山都督府在今宣府良山之南地多瓦礫永

樂初掘地者得斷碑並柱礎焉

何仙姑

何仙姑廣州增城人生而頂有六毫武后時駐雲母溪夢神人教之食雲母粉當輕身不死姑取餅之常往來山谷間行步如飛後漸辟穀語言異常武后遣使召赴闕中路復失景龍中白日昇天天寶九載見於麻姑佇立五色雲中大曆中又見身廣州小石樓今云宋時人不省所謂

駱賓王

駱賓王義烏縣東二十里上楓塘 賓王父履元任博昌令

女論語

宋若華著女論語十篇大抵做論語以常宣文君 符聖時常送母

宋氏傳周官 代孔子曾大家等為顏冉推明婦道所宜女弟若昭

又為傳申釋之

長生殿

臨潼縣南溫泉宮天寶六載改為華清宮其齋殿曰長生殿天寶元年作見寔錄有事於朝元閣即齋沐此殿南近東有明殿

程大昌雍錄曰溫泉在驪山與帝都密邇自秦漢隋唐人主皆嘗

游幸惟玄宗特侈蓋即山建宮百司庶府皆行各有寓止自十月

往至歲盡乃還宮又緣楊貴妃之故其奢蕩特為彰著大抵宮殿

包裹驪山一山而繚牆周徧其外觀風樓下又有夾城可通禁中

白樂天追咎其事作歌以為後監世喜傳誦然詩多不得其寔也

華清宮者本太宗溫泉宮也天寶六載始名華清而楊妃入宮以

太真得幸已在三載則華清未名而妃已先幸今曰春寒賜浴溫

清池始是初承恩幸時此已誤矣而又記其款昵則曰七月七日

長生殿華清宮固有長生殿而其地乃齋宿禮神之所本非寢殿

帝又未嘗以七月至驪山則白歌皆不審也

太甲

王勃夫子廟碑華蓋西臨藏五雲於太甲晉天文志華蓋七星杠

下九星今十六星太甲恐是六甲鄭以偉詩註

武成閣

唐初功臣皆云圖形凌烟閣河間元孝王碑興改志云碑皆云圖

武成閣豈凌烟閣元名武成耶見西谿叢語

花鳥使

天寶中密跡採取艷異者為花鳥使

李如暹

元微之新題樂府延州鎮李如暹蓬子將軍之子也嘗沒西蕃及

歸自云蕃法惟正歲一日許唐人沒蕃者服衣冠如暹當此日悲不自勝遂與妻密定歸計

滕王元嬰

滕王元嬰高祖之子也永徽初王以驕恣不法謫置滁始王宴封千戶為金州刺史驕縱失度在太宗喪集官屬宴飲歌舞狎昵廝養巡省部內從民借狗求宜所過為害以九彈人觀其走避則樂城門夜開不復有節高宗以書切責曰朕以王室親不忍置法今署下上考異媿王心久之遷洪州都督官屬妻美者給為妃召逼私之嘗為典籤崔簡妻鄭媠罵以履抵元嬰面血流乃免元嬰慚歷旬不視事後坐法削戶及親事帳戶之半謫置滁中

杜甫詩 滕王亭子君王臺榭枕巴山萬丈丹梯尚可扳春日鶯啼修竹裡仙家犬吠白雲間清江碧石傷心麗嫩蘂濃花滿目斑

人到於今歌出牧來游此地不知還又寂寞春山路君王不復行

古墻猶竹色虛閣自松聲鳥雀荒村暮雲霞過客情尚思歌吹入

千騎把霓旌王臺觀滕王自造中天積翠玉臺遙上帝高居降節

朝遂有馮夷來擊鼓始知羸女善吹簫江光隱見鼉鼉窟石勢參

差鳥鵲橋更有紅顏生羽翰便應黃髮老漁樵又浩劫曰王造平

臺訪古游綠雲蕭史駐文字魯恭留宮闕通群帝乾坤到十州人

傳有笙鶴時過北山頭宋嘉泰甲子建安蔡夢弼曰滕王元嬰調

露年間任閩州刺史在閩州有亭洪州有閣又有碧落碑趙子標

曰以魯恭比滕王必有詩文遺蹟在焉

譚遷曰古人湮沒多矣滕王以杜甫王勃至今著杜詩史果

貽玷閩州獨無少刺乎必為行政輒不僅：景物增勝也

追貶楊素

武后追貶隋楊素詔曰朕上嘉賢佐下惡賊臣嘗欲沒容於萬幾之暇褒貶於千載之外

梵勅

韶州南華寺武后勅免差役今存勅梵書墨跡如新 曾溪通志

一行

僧一行鄭公張公謹之孫博覽經史武三思慕其名請結交逃匿隱於僧梵

玄宗見道

不物、我、不是、非、忘意非我意、得非我懷 玄宗

天子別號

玄宗自稱上清弟子見華陽頌 武宗自稱承道繼玄昭明三光弟子南岳上真人見會昌投龍文

戒收軍碑

彰德林縣令解內有唐開元末明皇戒收軍碑口勅曰朕本求收軍務在理人前所策試恐有遺佚載令中書門下銓擇得鄉等高科副朕旁求之意郡縣者國之本收軍者政之先朕每屬意此官有殊餘賊頃來刺史縣令多不得人致令戶口未能安業斯亦朕之不德所致寤寐勞想揚搜所知親加試擇鄉等寔為舉首深副朕懷今故與鄉相見鄉等到任之日百姓間有不安德事一、條奏朕別知聽察仰鄉政能若一任之內風化有聞當擢以不次有非常賞若不達朕意苟復曰循止當有非常罰朕此舉可謂求仁得仁何憂郡縣不理又勅曰朕聞茲下人不忘鑒寐庶乎富教寄存收軍所以推擇才能親加考覈鄉等各膺時用副朕虛求亦既得人佇聞佳政若能銳精為理嚴績有稱即當待以不次信此言

之可復如其政不能舉行且有遺 豈獨敗於厥躬必將坐於舉主
此亦明約不得不然各宜勉之以成名節今賜卿少物刺史七十
正縣令四
正各宜領取並於廟堂坐食之訖好去又曰適已勅卿賜宜領取
卿等到任之日宣慰百姓知朕憂勤是選舉三十八人有林暉為
林應縣令彰德府志

宋璟薦鄭勉

開元時宰相宋璟荐儀州司馬鄭勉有才略文詞但性好異端好
是非改變若全引進則悔吝咎必至若長棄捐則才用可惜改硤
州刺史

鳳爪傷龍

開元中有鳳逐二龍至華陰龍墜地化清泉二道其一為鳳爪傷
流血泉色遂赤今有赤地山

談遷曰龍鳳俱麟羽之長稱神物御輦帝龍歸后鳳歸而二龍
見傷於鳳宜往帝為后所制也

張萬歲王毛仲

唐人養馬于涇渭近及同華置八坊其地止千二百三十頃樹首
皆苜蓿用牧矣三千官寮無幾衣食皮毛是資不取諸官蓋合牧
而散畜之專其事不雜以耕而太僕張萬歲王毛仲官職雖尊身
本帝園生長北方貫歷牧事躬馳撫閱無點集追呼之搜科索之
煩順天因地馬畜滋殖萬歲至七十萬六千毛仲至六十萬五千
六百有奇色別為群號稱雲錦地惟不窮增置河西史贊其盛圖
傳至今夫豈有他術或法簡而專誠而不二故也平涼府志

元倉子

宜城王仕原年十八登陵踐恒岳過薊門山問道于隱者元知運

入太行山採藥經王屋穿小有洞訪太白山習隱訣躡終南山天寶四載詔徵京邑論校孟浩然所著有元倉子

楊貴妃

楊貴妃容州普寧衛雲陵里人父維母葉氏生妃有異質都部署楊康求為女時楊玄琰為長史又從康求為女携歸京後進入壽王宮玄宗召為貴妃今梧州容縣有楊妃井 許子真記

長恨歌載玄宗避暑驪山以七月七日與貴妃憑肩誓心願世為夫婦天寶遺事又言帝與貴妃每至七月七日夜在華清宮游宴宮女皆陳瓜果乞巧皆悞也攷之史玄宗幸華清宮皆以十月其返皆以二月或四月未有過夏者野史之不足信狂如此五雜俎

聽鷓鴣聲

天寶十年常郇公陟謫守蘄州時李泌亦以處士放逐日夜飲聞鷓鴣常公泣下李曰此鳥人以為惡其聲可聽乃令坐客有不聞其聲者罰以大白由是聽之不厭

公主入道

玄宗女萬安公主 代宗女華陽公主 德宗女文安公主 憲宗女永安公主 穆宗女義昌公主 安慶公主時天下觀一千六百八十七

張九齡

劉夢得集言曲江為相建言放臣不宜與善地因致燕翼無似終為餒魂近世籌疇諸小說皆曰之不放之過也當 徐浩作公碑銘明言嗣子極居喪以孝聞立身以行著陷在寇逆不受偽官及收復兩京特制拜朝散大夫右贊善孫藏器河南府壽安尉永保

先業克稟義方是公且有賢子孫矣及見唐書宰相世系表九齡子極右贊善大夫極子藏器長水丞藏器子敷慶袁州參軍敷慶子景能景能子謂嶺南觀察衛推弟鄮湖南鹽鈇判官謂子浩仁化令孫文嵩監東大倉自九齡至文嵩八葉之中仕宦不絕而夢得云、非竊語耶一時浮言聞之不加審諦輒形帝墨世之類此者當為不少 焦竑題曲江集

天寶迴文詩

范陽盧其母瑯琊王氏於景龍中撰天寶迴文詩凡八百一十二字誠其子曰吾沒之後爾密記之若逢大道之朝遇非常之主當以其因上獻至玄宗朝東平太守始上之高適代為之表

安祿山反兆

安祿山城雄武扼飛狐塞王忠嗣上言祿山且亂此忠嗣之先識

也時祿山以薊為巢穴恐河東之勁兵擣之飛狐塞則兵無從入矣 大同鎮志

飛狐今之黑石嶺也宣大入中原惟有二門居庸直其後紫荆當其前由後必於雞鳴由前必於飛狐

安祿山將反前數日集大將十餘人宴齋甚厚滿廳施山川險易攻取剽劫之勢每人付一圖令曰從某處會洛陽有違者斬諸將承命莫敢出敵及至洛陽悉如其畫 出聞鼓吹

畢炕

唐平太守畢炕拒安祿山城陷覆其家唐書附其父畢構傳不見於忠義傳溫公通鑑亦失書 楊慎

李林甫詩

李林甫贈韓席侍郎詩撥予秉孤直虛薄忝文昌

王維

王右丞維自其父官司馬徙家汾州然寔祁人也 明萬曆間祁
閻氏築宅忽地陷得骷髏宛然中有菴枕、上有剔銀灯詞乃右
丞父聞沈金喜信作也邑人李無言倡祁上同志歛錢改厝 譚元
春嶽歸堂集

成化間北京大內厚載門有丹漆巨楹以支北扉久矣楹偶墮地
破乃髹竹也中藏卷三其一王右丞圖山水呈 上覽明日賜大
監黃賜用細練高尺二寸長四尺奇前後周完未正書曰王維製

端正樹

玄宗發馬嵬至扶風道上有右楠樹圍之愛玩久之呼為端正樹
孫景安征瑩記馬嵬人名於此築城以避難未詳何代人姚萇
時扶風王駢以數千人保馬嵬故城

興平縣南二十五里有楊妃塚又有馬嵬故城馬嵬故驛馬嵬泉
楊妃塚前有土如粉人謂之楊妃粉

金帶補

玄宗幸蜀偶值村婦解金帶賜之至今名其地金帶補 明喻時
詩村婦是何人贏得天子帶還似愛玉奴不恤中原害

內臣妻

高力士妻 氏 李輔國妻吏部侍郎元希毅姪女又內侍妻王
氏墓志王孟諸撰

于闐國王勝

肅宗時于闐國王勝入朝讓國于弟曜身留宿衛三十年生子銳
曜上書以國還銳天子遣之勝止不遣

南霽雲

貴州多祠南霽雲名曰黑神或曰霽雲死為神主南嶽故南人祀之子承嗣請江郡太守多善政今思州隋清江也點記

于休烈

于休烈為太常少卿兼脩國史於時經大盜後史籍燔闕休烈奏國史寶錄等書二千八百篇藏興慶宮焚蕩皆存請下御史覈史館所由求府縣有得者許上送官一書進官一資一篇絹一匹凡數日止獲一二有常述以其家藏國史百三十篇上獻

孝經

孝經開元中刪閨門一章以劉炫偽之也朱文公定孝經收小旻戰兢一章

佛經

隋大業時佛經六千一百九十八卷唐開元時五千四十八卷宋

雍熙初增新經凡九千五百卷

春秋

趙啖曰春秋明白如日月簡易如天地

寒食

開元初勅寒食上墓近代墓祭蓋出於此

邯鄲夢

邯鄲呂仙祠馬攀龍記云按枕中記開元中呂翁徑邯鄲道中授盧生枕而呂純陽或云生於德宗貞元戊寅或云文宗開成始舉進士游長安相距遠甚祠中乃像鍾離翁伯純陽為非是或又謂盧之炊黍就枕之夢與純陽炊黃梁未熟之夢相似本一事也訛而為二然亦不可攷矣

八閩齋會石幢

歸德唐之宋州也。有八閩齋。會報德記石幢。顏真卿書。在故開元寺中。會昌間。寺廢。因毀幢之半。後刺史崔倬。墓刻之。幢形八觚。頂如覆釜。其記宋州刺史為河、鄆度。田神功。建神功。救李岑。解宋州之圍也。

常應物

常蕪州少以三衛郎事玄宗。豪縱不羈。玄宗崩。始折節。務讀書。故其逢揚開府。詩少事武皇帝。止賴特恩。私自作里中橫家。藏亡命兒。朝持樽蒲局。莫竊東隣姬。司隸不敢捕。立在白玉墀。一字都不識。飲酒肆頑癡。韓子蒼

元結

元魯山、居阻水。絕食而死。王元之小畜集

杜甫詩籤

射洪陸使君廟。以杜詩為籤。極靈。陸游渭南集

蜀人以釜為銚。杜詩荆扉生蔓州。土銚冷踈煙。

花卿

杜子美贈花卿詩。錦城絲管日紛紛。半入江風半入雲。此曲祇應天上有人間。那得幾回聞。趙子標曰。古歌詞載林鐘宮小調。入破第二云。錦庭絲管曉紛紛。半入靈山半入雲。此曲多應天下有人間。能得幾回聞。按花卿名敬。定劍南節度。崔光遠之末將也。黃山谷曰。楊明叔為余言。花卿塚在丹稜之東。館鎮至今。有英氣血食。其鄉見封為忠應公。

王母鳥

杜子美郊壇歌子規夜啼山竹裂。王母晝下雲旂翻。宋中官陳彥和在宣和間。掌禽苑。言蜀中貢王母鳥。狀如燕。色紺翠。尾甚長。飛

則尾開鸚鵡象如兩旗

小寒食

小寒食見杜詩

李伯禽

貞元五年李白子伯禽為嘉興乍浦下場雜監官侮慢神廟以死
太平廣記

蔡泌

晉江蔡泌貞元中進士按歐陽唐登第為閩破荒蓋馮韓文公歐
陽生哀詞而舊志載泌先歐登第未知何年
閩書

私白

唐時諸道進私白閩中為盛杜宣猷未為福建觀察使每寒食遣
吏分祭其先壟時謂宣猷為勅賜墓戶私白者閩兒也

僧懷濬

福州僧懷濬有上懷州刺史詩二首家在閩中東渡東其中歲
有花紅如今不在花紅處花在舊時紅處紅家在閩中西渡西其
中歲有鶯啼如今不在鶯啼處鶯在舊時啼處啼此詩似竹枝
詞類今吳歌然卻有三百篇之音

韓家莊

吏侍鉅鹿耿裕考韓文公家莊在懷慶府孟縣西十里孟本唐河
陽故城在孟縣南十八里唐末廢河陽置孟縣國初因之為孟縣
公寔河陽人生有歸河陽省墳墓之又設六墓於是皇甫湜撰公
墓碑云歸河陽韓氏先塋則公為河陽人本無疑者不以訛為南
陽人蓋南字即河字之誤抄錄者之過也公集中言河陽者不一
竟無一語及南陽公豈忘本耶又縣東有韓莊韓湘塚則公世居

於是而云他何也

脩武縣東北三十里曰南陽縣韓文公之故里也居人呼其地曰韓庄又曰韓村愈自上世居此按李翱為愈作行狀曰昌黎人而愈亦嘗自稱昌黎又皇甫湜為愈作墓志銘不言鄉里李白作愈父仲卿去思碑曰南陽人嗣後劉煦舊唐書列傳亦曰昌黎人蓋本諸行狀而歐宋新唐書乃增曰鄧州南陽人蓋本諸去思碑而悞加鄧州二字也昌黎古韓氏通稱如李必曰隴西崔必曰博陵孫必曰樂安耳今脩武之韓庄有愈墓存焉則愈之為脩武人明矣

河南通志

永平府昌黎縣西五里韓愈高祖以上之墓地自其曾祖奉任曹州司馬回家於河陽子孫不復在此

永平府志

大顛

韓退之問大顛曰師春秋幾何大顛提數珠示之曰晝夜一百八退之惘然問首座曰和尚言晝夜一百八意旨如何首座叩齒而已他日復見大顛問曰晝夜一百八意旨如何師亦叩齒於是退之自喜曰今知佛法無二道也時大顛即石首座問信然即杖而逐之汾陽照禪師偈曰解屐机鋒是大顛明知不是小目錄一般叩齒叢林異出險韓公始得閑 談遷曰此僧家假托昌黎并誣大顛也昌黎問年如吾輩平常寒溫非問佛法也在大顛自寔告正不必作如許伎倆若概如此則名緇之前措不得一閑語矣且昌黎篤寔人果有此答伊且笑而置之叩首座何為

韓木

潮州無椽木韓文公植椽于韓山移而種之他山不椽也土人名椽曰韓木

郭子章粵草

退之像

晏公嘗于昌黎見韓退之像與歐陽永叔絕類故目永叔為韓公
再來

茶仙

杜牧之詩誰知病太守猶得作茶仙宋滁州僧永建茶仙亭

綠野堂

裴晉公綠野堂乃李龜年故第後傳至宋王旦不取張齊賢市之

陽城驛

商州南山陽城驛元禎敗江陵過之不忍呼其諱改為避賢郵白

樂天在翰林聞而和之又見在紫微富水驛注富水驛舊名與陽

諫議同王元之集

孫樵家僮

孫樵家僮犀角鴈兒見祭高諫議文

白雪樓五客

鍾祥縣石城下白雪樓下臨江李昉守郡時畫五禽壁間鶴曰仙

客孔雀曰南客鸚鵡曰西客鷺鷥曰雪客白鷗曰閑客

釋道英

釋道英戒德克全名振天邑住寺在布政坊咸亨中見鬼物寺主
慧簡嘗曰晚見二人不踐入英院為簡怪而問之英曰向者秦
莊襄王使一傳語饑虛甚久以師大慈欲望排食并從者三百人
勿辭勞也吾以報云後日晚具饌可來專相候耳簡聞言以酒助
之及期果來侍從甚嚴坐食倉皇謂英曰弟子不食八十年矣英
問其故荅曰吾滅東周絕姬嗣或責以功德惟以赦宥矜恤惻獨
塞之終為未補福少罪多受對未畢今此一餐更四十年方復得

食曰歷指座上云此是白起王翦為殺害多罪報未終又云此陳
軫以虛詐故 英曰王何不從人索食而甘虛腹此奚可忍
乎王曰慈心人少吾緣貴人不可妄行崇禍所以然也垂去謂英
曰甚感傷費厭厭弟子有少物即送相償城東通化門外天塚銳
上而高大吾棲神之所世人不知妄云呂不韋塚耳英曰往遭赤
眉開發何有物來曰賊取不得曰貧道非發丘中郎出家人無用
物必勿將來言訖長揖而去

董召南故里

壽州安豐鄉古屬縣唐董生召南故里其地多陂池好田物產饒
故老長者稱說董生猶能傳其行事

賈島

房山縣南十里石樓村有唐詩人賈島墓又景州西南五十里賈

島村一曰賈島峪

吐蕃

唐憲宗時吐蕃使其中書令尚騎心兒攻燉煌刺史周鼎嬰城固
守鼎請救回鶻踰年不至都知兵馬閻朝殺鼎自領州事守城者
八年出綾一段換麥一斗存者甚眾朝喜曰可以死守又二年糧
械皆盡登城呼曰如毋徙他境請以城降騎心兒許諾於是出降
自攻城至是十一年州人皆改服臣虜歲時祀祖父衣中國之服
號慟而藏之

穆宗時遣大理卿劉又鼎出使吐蕃道成紀武川以至龍支城耆
老千人拜且泣問天子安否言頃從軍戰沒于此今子孫未忘唐
服朝廷尚念之乎兵何日來言已皆嗚咽問之豐州之人也

石徑

文宗太和七年石刊九經并孝經論語爾雅共一百五十九卷字樣四十卷開成二年告成今在西安文廟碑洞中

門墩

唐盛時京師開遠門外立墩云去西安西九千九百里以示戒人不為萬里行

偽書

白樂天先有秦中吟及百部判皆為書肆市賈題其卷云白才子文章後輩好偽作余詩傳流諸處自到會稽已有人寫宮詞百篇及雜詩兩卷皆云是余所撰及手勘驗無一篇是者

樂天於翰林中書取書詔批卷詞等撰為程式禁中號曰白樸每有新入學士求請寶重過於六典也以上俱元微之詩自注

甲門

近世不以勲賢之胄為令族而以崗盧澤李為甲門見元稹送王師範詩註

度外星辰

交廣間南極浸高北極浸低圓規度外星辰至衆大如五曜者數十皆不在星經元氏長慶集詩註

錢塘公館詩

龍溪周匡物錢塘公館詩萬里茫茫天整遙秦皇底事不安橋錢塘江口無錢過又阻西風兩信潮按施肩吾亦有此詩天整茫茫連沃焦秦皇何事不安橋錢塘渡口無錢納已失西風兩信潮

六詔

蒙雋詔越析詔浪穹詔鄧賧詔施浪詔蒙舍詔

星命

李虛中最深於五行書韓文公志其墓
命書本於都利韋斯經都利蓋都賴也西域康居城當都賴水上
則今所傳韋斯經者婆羅門術也李弼軋寔婆羅門伎士而羅睺
計都六胡梵之語

軌策卦影

軌策卦影見宋類苑今術家畫休咎或龜或鸚鵡啣出以為驗

崔鶯

予於粵西見唐李給事撰崇陽鄭府君夫人博陵崔氏墓志銘云
夫人四德兼備六親雍和母儀內則動靜可思禮行詩諷進止成
法以大中九年正終於淇澳年七十有六子六人瑣珮瑾瑜璿琬
皆有名位其志瘞土久矣成化間畊者得諸廢塚鬻之鄭氏為中
亭香案石又若干年而魏縣令愛其迹置之邑治陳仲醇又以其

文刻之右文錄曰崔氏一辱於元微之會真記再辱於伶工戲狎
褻侮越千百載而後為崔氏一洗水玉之恥然予疑崔氏未嫁失
身于元惡有冰玉可洗其後見三水續志云崔雙文美麗絕世才
德踰人元稹以中表親相達逆旅挑之固拒不從稹銜投梭之恨
偽為會真記自撰往來問答書以辱崔氏其後居位論者及此事
於章疏此足信哉稹與梁天齋名稱元白居易始終以直道與天
子爭可否而稹附離權勢排陷裴度等諸君子阻撓蔡功其後徹
俸得相名望漼然彼固頹險士不難于謗諸君子而難于辱一婦
人乎會真記文絕佳而風流事又為人喜談樂道孰為洗之吁嗟
千古以來正士之被傾賢女之被玷者不少矣 馮時可禪談
元微之狂醉詩一自柏臺為御史二年辜負兩京春峴亭今日顛
狂醉舞引紅娘亂打人

薛濤井

成都府錦江南岸舊名玉女津水極清剛今入蜀王邸內環以欄
楠人不敢汲專備製箋之用歲三月三日汲水造箋二十四幅入
貢止四幅餘留藩郡以觀時貴今皆他日造未必三月三日也市
肆間絕無買者

唐曾因墓志銘

君姓曾名曰字鄙夫世為都陽人祖父皆仕唐高祖朝唯君三舉
不第安命樂道絕墨自守及卒於長安道朝士里人無不太息予
獨不然慰其母曰百畝足養百卷足遺縱浪大化游戲小兒死生
聚散萬古常身何足掛靈府哉予周氏君室也歸君八載恩至
義篤故贈之銘曰其生也天其死也天達人觀哀復何言

陷虜子孫

肅宗初召邊兵赴難吐蕃因陷河西隴右華人百萬皆陷於虜文
宗時嘗遣使至西域甘涼瓜沙等州人夾道迎泣曰皇帝猶念陷
者人民存其人皆天寶陷虜者子孫其語言稍改而衣服猶不改

呂岩

呂岩蒲州永樂縣人會昌中再舉進士不第遇鍾離子得道河東
呂陽曰岩謂之孫海州刺史讓之子咸通中擢進士第

東都九老會

前懷州司馬安定胡杲年八十九 衛尉卿致仕馮翊吉旼年八
十八 前磁州刺史廣平劉真年八十七 前龍武軍長史滎陽
鄭據年八十五 前侍御史內供奉官范陽盧真年八十三 前
永州刺史清河張渾年七十七 刑部尚書致仕白居易年七十
四 秘書狄兼謨河南尹盧貞以年未及七十雖與會而不及列

會昌五年三月二十四日會東都履道坊各賦七言四韻詩一章

麒麟草

元和時館閣湯飲待學士者煎麒麟草

早藕

大曆中高郵民張存以踏藕為業嘗於坡中見早藕大如臂極力掘之深二丈大至合抱似不可窮乃斷之中得一劍長二尺色青無及存不知寶郡人有知者以束薪易獲焉其藕無絲

揚州志

石孝忠

石孝忠者生長韓魏間有膂力少時偷雞狗州里苦之後折節事李愬前驅元和中天子用裴丞相征蔡愬與光顏重胤皆受丞相節制明年蔡平刑部侍郎韓愈撰碑專歸功丞相孝忠見其文大恚怒曰作力推其碑更不能止及執詣節度使命具獄將斃之碑

下孝忠度必死乃佯卧地若不勝按驗狀吏就詰之孝忠伺隙用枷尾拉殺之上聞之使送闕下及至問曰汝推碑殺吏為何對曰臣死未足塞責今得面天顏一言赤族無憾臣事李愬歲久平蔡之日臣在軍前吳秀琳蔡之奸賊愬降之李佑蔡之驍將愬擒之爪牙脫落而元濟縛今刻石紀功盡歸丞相而愬名第與光顏重胤齒愬固無言不幸更有一淮西其將如愬者復肯為陛下用乎賞不當功罰不如罪非陛下所以勸人也臣惟碎石能推明愬績亦將為陛下正賞罰之源臣不推碑無以為吏擒臣不殺吏無以見陛下臣死不容時矣請就刑帝既得淮西本末且多其義遂赦之曰命曰忠烈復召段學士撰碑如孝忠語

羅隱集

舉直禪師

舉直禪師懿宗子僖宗弟杖錫游揚州以太平倉地請於朝詔建

鎮國禪院居之仍賜號舉直後塋于院隅立浮屠五級元豐末發
藏及隧得函柩金骨不解朕若鉤鎖俄見舍利發異光人驚異之
揚州志

申包胥廟悞

劉琬在江陵易伍子胥祠曰申包胥之廟宋於潛梅聖俞在蜀毀
鄧艾祠更祠諸葛武侯

聖米

僖宗乾符六年二月秦州苑內四縣生聖米大如茨寔

普聞禪師

邵武軍龍湖普聞禪師僖宗太子也幼不茹葷長無經世意僖宗
鍾愛之然百計陶焉終不能回中和初僖宗幸蜀師斷髮逸遊人
無知者造石霜問道言下頓省辭去至邵武城外見山鬱然深秀

遂撥草至烟起處有一苦行居焉苦行見師至乃曰上公當興此
長揖而去師居十餘年一日有老人拜謁師問何住至此何求老
人曰非人龍也住在此山行而不職上天有罰當死願垂救護師
曰得罪於帝我何能力雖然可易形以來俄失老人所在視坐旁
有小蛇延緣入袖至暮雷電震山風雨交作師危坐不傾達旦晴
霽垂袖蛇墮地去有頃老人拜泣曰自非大士慈悲腥穢此山矣
今何以報即穴岩下古泉為他日多眾之設當時龍湖人聞其事
施舍財力相与建寺衲子雲趨師闡化三十餘年臨寂聲鐘說偈
而逝塔于本山謚負覺禪師五燈會元考唐史僖宗年二十有七
而崩其幸蜀之年方二十一安得有子長無經世意又能斷髮遠
遁者或唐諸王孫借太子之名出家耶

林慎思續孟子

林慎思字虔中長樂人自校書郎至水部郎中萬年縣令黃巢寇
長安迫以偽祿不屈罵賊死慎思謂孟子七篇非其所著書而第
子所記不能盡孟子意因傳其說演而續之作續孟子又有紳蒙
子書

羅隱

唐末羅隱乞食晉江縣羅裳山下山下人侮之隱乃畫馬面石每
夜出食人未追之則見馬復入石山下人乃礼焉隱為画椿繫馬
馬不出笑今其跡瞭然好事者力鐫深刻欲与正輒不久漫滅也
又晉江縣石壁山石刻深扈二如画馬石蹟亦傳

莆田縣大埕山南至崎頭二里許有羅隱廟故老云昔海中浮大
木数百畫鷁羅字鄉人獲而鏜之逾鏜逾明相顧驚異數日見一
人戴冠黃袍屹立山下曰我羅仙也行來居此言訖不見鄉人為

立廟南唐封光澤王海商祈風分帆南北

閩書

奚冠耳面

幽州節度使張仲武奏破奚北部落及諸山奚除舊奚王匿即所
管外殺膠首領丁壯老幼并殺擄牛羊絛燒車帳器械等計二十
萬刺史以下面皮一百具耳二百隻

李商隱代作表

楊筠松

唐末楊筠松與僕都監俱諳陰陽隸司天監黃巢亂時楊筠秘書
中禁術及僕自長安走贛州寧都懷德鄉以其術傳里人廖氏

皮日休

廣明末皮日休避難徙會稽依錢氏官太常博士子光業事吳越
拜相見尹師魯皮子良墓志 唐書日休以著作佐郎出東關陷
賊以讖文被害悞甚

陸游老學庵筆記

香奩集託名

香奩集和凝作託名韓偓

孤魂及第

唐末詔錄名士方干等賜孤魂及第

乾陵

溫韜徧發諸陵惟乾陵風雨不可發此事至今猶然絕不可解于
慎行雜記曰嘉靖戊申先君作吏隴右道出乾州其土人言過武
則天陵不可指議如有謾語輒以雷雨報之先君弗信為一詩詆
之云出門正晴行不數里雷雨大作無可依泊得道旁郵舍牛
豕滿中不得已一駐車馬仲兄無妄年甫十七再過其地為賦一
詩詆之其詞不記行至道中忽遭風雨千年虐焰猶能作腥臊氣
豈別是一種妖魂死而不能忘者耶

塚鬼上書

高軒發古塚取執斃成都羅城鬼趙春現形上書曰趙氏之冤搏
膺入夢良夫之狂披髮叫天有怨必仇無道則易流於往史載在
前文春一介游魂九泉固象德不勝身禱不勝人無廟貌于世界
遂瀆沉于泉壤自蒙天譴便掌冥司伏審渤海高公令君毀春墳
闕謫居冥府天賜佳城平生無戰伐之仇解后起誅夷之釁得
不撫銘而憤志託觚翰以伸懷伏希端公俯念無依回垂有鑒特
於萬難免此一杯倘全馬鬣之封敢忘龍顏之庇

朱葆光

南陽朱葆光以朱全忠篡唐與唐舊臣顏荑李燾教輩挈家南渡
寓潭州每正旦冬至必序立南岳廟南望涕慟殆二十年

通腸米

唐末孫孺之亂斗米四十斤金玉換易僅得撮合謂之通腸米至
于金玉換通腸米而不可得 南楚新聞

如京使

梁改太倉使曰如京使取魯孫之度如珉如京也

康王重瞳

梁朱全忠子友敬目重瞳

契丹辨璽

石晉出帝重貴降契丹德光上表獻玉璽金印契丹得璽以為製
作非工与前史所傳者異命延煦等還報求真璽出帝以狀荅曰
項王後珂自然於洛陽玉璽不知所在疑已焚之先帝受命玉
工製此璽在位諸臣皆知之乃已

孫郃

唐末左拾遺奉化孫郃遭朱溫篡唐著春秋無賢人卜世論即脫
冠服布衣以終署書紀年志用甲子

內黃

梁太祖幸河北至內黃問李璉曰何謂內黃璉曰河南有外黃下
黃故此名內黃太祖曰外黃下黃何在璉曰秦有都尉理外黃其
故壩在今雍丘下黃為高齋所廢在今陳留太祖平生不愛儒者
聞璉語大喜

李崇禮

唐莊宗弟名崇禮封薛王值郭崇謙之亂匿名避難樂延安山水
留居焉結廬坑口罄囊金以賑貧乏病革出封誥示人始知其
出處宋淳熙中鄉人祀之廟曰永慶

王審知

閩王王審知以五月五日死閩中以五月四日作節 福州府志按

五代史審知以十二月死非五月也

王審知墓在蓮花峯下宣德四年盜發獲金珠亡算有司仍復修治

王延鈞母家

惠安縣南靈秀山閩王王延鈞母家在烏母黃姓審知聘女為妃及延鈞僭號追崇曰后龍啟二年十一月癸丑延鈞來謁黃氏家廟次日曉起問黃家人曰夜來窓風剪、瓦霜稜、地如斯時暫牙常牙有克宗者對曰茲地濱海遇秋之日如城郭之冬也延鈞乃命沿海居民屋瓦悉得黏土泉屋黏瓦始自王延鈞 明王世懋閩部疏云漳泉間燒瓦皆黃色郡人以海風飛瓦奏請用筒瓦民居皆儼如黃屋蓋行部使者徒問之隸人與卒何以得其土風

故寔耶又江右鍾允復初登第夢作一縣、中都是黃屋不知何祥也尋銓晉江令 閩書

劉隱祖

劉隱祖安仁上蔡人也後徙閩中商賈南海因家焉父謙為廣州牙將謙三子曰隱台龔知是故寓居而安也 龔音 唐敦仁有復劉從効問龔詩伏羲初畫卦蒼氏乃製字點畫有偏傍陰陽音協比古者不嫌名周人始稱諱始諱猶未酷後習轉多忌或援他代易或爰文迴避濫觴久滋蔓傷心日益熾孫休命子名吳國尊王意 甯蒞靈異僻輿显竅契異梁後踵已非時六迹舊事翫杰自其一 蜀闖是其二鄙我仇啓名陋矣越艱義大唐有天下武后擁神器私制迄無取右音寔相類乖胤回因星胤惡屋丙坐正固及壘嵐作史雜詳備唐祚值傾危劉龔懷僭偽吁嗟毒蛟輩睥睨飛龍輩

龔儼雖同音形体殊乖致廢學規未弘
來問不棄奇字雄雄博
攝文伏韓智曰誦鄙所聞散布諸下吏

吳越改元

歐陽修作五代史謂吳越儀衛名稱多如天子惟不改元至著十
國世家云聞之故老亦嘗稱帝改元而事無可攷獨得其封落星
石為寶石山制書稱寶正六年辛卯耳按辛卯即唐明宗長興二
年又至正中海鹽古墓有志碑為吳越將許俊志稱寶正二年又
寶泰元年羅隱新城縣記癸未歲癸未乃唐莊宗元年以此見吳
越之改元審矣 董穀碧里雜存

宋時王順伯收臨安府古碑有尸屋崇化寺幢題天寶四年明慶
寺幢題天寶五年九里松觀音尊勝幢題寶大二年水月寺幢題
寶正元年招賢寺幢題寶正二年小明慶金牛瑪瑙寺九幢皆題

寶正貢院橋柱題寶正六年至武肅王薨遺命去國儀用藩鎮法
臣事中國然則天寶寶大寶正三名皆僭號也 田汝成西湖志

吳越備史

吳越備史錢氏諱佐故以左為上凡官名左字者悉改為上此書
所謂上右者乃左右也 陸游跋

錢武肅王諱石榴為金櫻茄子為落藕

吳越貢道

吳越王錢氏貢中國由海上達登萊凡三千里

南唐程式

廬江伍喬舉進士第一命勒喬程文於以為永式

南唐劉仁瞻像

宋王旆游金陵昇元寺見房壁有繪金紫大夫像上題詩曰陣前

金牌生無媿鼓下
蚤奴死餘羞三尺生
綃暗塵土凜然霜鶴欲橫
秋旒不能解捲
画歸示其父平甫曰
此劉仁瞻像表世弼詩也
漁
隱叢話

孟賓

唐末孟賓詩那堪雨後更聞信絕重湖
路十千憶昔故園楊柳
岸全家送上渡頭船見王元之小畜集

胡嶠陷虜記

歐陽修五代史述同州邵陽令胡嶠為遼蕭翰掌書記隨入其國
當周廣順二年亡歸道其所見云自幽州西北入居庸關明日又
西北入石門關之路岨狹一夫可以當百此中國控扼契丹之險
也又三日至可汗州南望五臺山其峰最高者東臺也又三日至
新武州西北行五十里有雞鳴山明日入永定關唐故關也又西

日至歸化州又二日登天嶺四望冥然黃雲白草不可窮極同行
者皆慟哭欲絕明日再行所見多奇異草木迂徐數月乃至榆關
至儒州又皆漢地矣信嶠所云則教州往返程計甚多以今考之
武州即為歸化儒州逼近可汗自古俱為百里不出二百里間而
嶠云云蓋來自異域出奇談以誇示中國耳博洽如文忠頗輕信
之耶夫周廣順去石敬瑭時頗近而汴都去居庸亦止二千餘里
乃所傳聞固已如此况南宋去仁宗之時武夷去西陲之地視此
更加繚繞無怪蔡沈書傳有鳥鼠山之誤也嗚呼中國之士一論
異域中國人遂視為大宛于闐則凡胡元時海外必將狝我中國
而我 聖祖重關乾坤之功誠萬世所當繹思云
宣府鎮志

喬元陸軌

喬元陸軌襄漢人仕周為殿侍東三班宋祖受禪自宣祐門入守

者拒勿納乃自門入既即位召宣祐門守者皆自殺太祖大驚
趨救之得不死者二人詢之乃喬陸也改班長人以青紅二色帛
為帽飾二人既出復自殺太祖義之命立祠祀之南渡後立廟于
杭州 杭州府志

宋初藏書

宋初無為軍一道士多書如唐人文集無不備又浮屠慧遠收古
人簡牘宋朝自開國至崇觀間凡各臣及高僧筆跡無不備

柴世宗二子

柴世宗二幼子宋太祖分賜功臣潘美尚書盧諤各子之俱冒其
姓 馮元成集

孟昶男

蜀王孟昶降宋入朝舟過眉州灤渡一宮嬪有孕昶出之祝曰若

生男孟氏尚存後果生男

樊若水

南唐樊若水北走宋江南皆知其獻南征策或請誅其母妻李煜
不敢但羈至池州其後若水自陳母妻在江南朝廷命煜護送厚
遣之

王彥昇餒死

王彥昇字光烈蜀人徙居長安工擊劍為軍校以推戴太祖當受
禪時太祖惡其專殺韓通止授原州都巡檢彥昇驕猛番夷或犯
法人有不愜意者自搏其首齧食其耳然番夷震懼莫敢犯後餓
死汴京

宋制

禁中處分事付外謂之內批又謂之御筆皆內夫人代筆而所謂

御寶批者或上批或內夫人批皆用御寶惟親筆則上親書押字不必用寶宋制惟兩府得賜金帶佩魚謂之重金

宋科目惟進士及九經五經開元禮三史三禮三傳學究明經明法諸歲舉為常然諸科賜第者後復應進士舉則進士尤重也攷建隆初禮部設進士及諸科皆秋解冬進禮部春考試合格及第者列名放榜于尚書省不第者仍候秋解凡進士試詩賦論各一首策五道論語十帖對春秋或禮記墨義十條凡九經帖書一百二十條對墨義六十條凡五經帖書八十帖對墨義五十條凡三禮對墨義九十條凡三傳一百一十條凡開元禮凡三史各對三百條凡學究毛詩對墨義五十條論語十條爾雅孝經各十條周易尚書各二十五條凡明法律令四十條五經并用毛詩之制各開經引試通六為合格諸州以判官試進士錄事參軍試諸科試

諸科見任官歸鎮廳試所屬先以名聞得旨 解凡就試惟詞賦

者許帶切韻玉篇而楷版籍察素行嚴互保連坐之法挾書口授有禁不稱恩師門生則通諸科皆科先是將赴貢院臺閣近臣得荐所知名曰公荐乾德初禁之覆試殿試省試之八月皆始于

開寶中殿試加論一首而以三題為準榜分三甲皆始于太平興

國間嘉祐二年與殿試者始免斥落治平間始定三年一開科神

宗始罷諸科併于進士熙寧三年始頒經義式取士而殿試專策

分五甲為後以凡貢於鄉而試于禮部或廷試不錄者積舉數而

參以年臨軒日得別籍名以奏徑許附試謂之特奏名學校則內

舍生間歲一試補上舍上舍生積校已優舍試又入優等謂之兩

優釋褐中選者即命以京秩除學官元豐中元舍法上舍生得免

秋解重和元年始有武舉之科宣和中推行元豐舍法於諸路於

是縣有免解進士未幾廢南渡以後科目互為變更然其取人不
過經義論策詩賦而已紹熙元年又有宗子正奏附進士之選
張岳惠安縣志云余觀宋場屋士習之變改其是非得失與國相
盛衰自嘉祐至開寶士氣淳厚中間文体雖卑弱險恠然無敢為
私學曲說以亂之治平熙寧以後乃有國是說倡于新法和于紹
述蔓于和議而極于偽學學士有一言不合國是者則指以為怪
妄斥逐禁錮無餘力於時薦進之士莫不翕然從之而宋之國事
亦且從而南渡變而臣虜從而閔之廣不可為矣推原其故士
大夫爭私意其上學術不明人心蠹懷其禍乃至此極豈非後來
永鑒耶

宋制賜進士第命中書行詞其書勅鄉貢進士姓某則南省第一
人也

宋制大比之歲每州皆有貢院郡州士子皆得入試

留鎮賜第

宋初第五季之患召諸鎮節度會于京師賜第留之分命朝臣出
外列郡節權知軍州事軍謂兵州謂民也

曹彬殺鍾情

曹彬為周太祖張貴妃從子世掌內職其克南唐學士鍾情朝服
坐於家彬兵及門舉族无遺

改姓

陶穀原姓唐因避石晉諱而改真德秀原姓慎因避孝宗諱而改
五雜俎

水灌太原

太祖攻北漢引汾水浸太原城水自城門入有積草自城中颺出

塞之會暑雨軍士多疾乃班師王師已去繼元決城下水注之臺
駘澤水已落而城多摧圮契丹使者韓知璠時在太原歎曰王師
之引水決城也知其一而不知其二若知先浸而後涸則并人無
類矣

土司世姓

楊延昭初名延朗延廣初名又廣以三世復有又廣故諱之今播
州宣慰司楊氏之祖

開寶中宋景陽以軍功累官節度使平定西南夷詔就大萬谷落
開總管府夷人安之遂世爵其地歷十四世曰阿重始仕元改順
元等處軍民宣撫使開治于貴州又三世曰欽官至昭勇大將軍
順元等處都元帥 明初內附拜貴州宣慰司世烏點記

定七夕

太宗太平興國二年七月詔七夕嘉會著於令甲今之習俗多用
六日非舊制也宜復用七日且名為七夕而用六不知自何時以
然唐世無此說必出于五代耳洪邁容齋三筆

戟門

建隆間始立戟稱戟門

鄉墨

唐宋明經帖書墨義許公呂夷簡應本州鄉舉試卷墨義十餘
條如云作者七人矣請以七人之名對則對云七人某也謹對
有云見有札於其君者如孝子之養父母也請以下文對則對云
下文曰見無札於其君者如鷹鷂之逐鳥雀也謹對有云請以註
疏對者則對云註疏云謹對有不能記憶者則只云對未審其
上則具考官批鑿如所對善則批一通字所對誤及未審者則批

一不字 見東陽呂氏家塾刊本

王禹偁與馮伉書

禹偁 讀唐史見陸忠州之在相位也擯斥李吉甫不容於朝及有南賓之貶而吉甫方為刺史贊之門人故吏亦皆危之泊到貶所而吉甫待之頗厚有庶僚見宰相礼又贊皇公之秉鈞也排逐牛僧孺有循州之謫及德裕南遷奇章公量移在汝贊皇路由此郡而僧孺接之情礼甚至為道南方風土之宜殊不以向之嫌隙為意賢哉二君子之操心也如是豈古之所謂以德報怨者耶 禹偁
向以紫微郎兼廷尉事亦嘗議閣下之過今有商於之命而親友間往相唁誠以閣下通理是郡也 禹偁 則獨以為不然且夫以怨報怨皆私事也故雖睚眦必報矣今 禹偁 於閣下議刑公事也閣下豈以為怨乎雖 禹偁 之名位才業望忠州贊皇也遠矣而閣下讀書為文立身行事豈不知吉甫僧孺之為人乎望閣下觀古人之行敦同年之契窮愁之中少假氣燄則遷客之幸也 禹偁 頓首

李煜被禍

李煜歸朝為左散騎常侍遷給事中太宗一日問徐鉉曾見李煜否鉉對以臣安敢私見之上曰卿第往但言朕令卿往相見可笑鉉遂往望門下馬但一老卒守門徐求見卒言有旨不得與人接豈可見也鉉云我乃奉旨來見老卒往報徐入立庭下久之老卒遂入取舊椅子相對鉉遙望見謂卒曰但正衙一椅足矣頃間李主紗帽道服而出鉉方拜李主遽下階引其手以上鉉力辭賓主之礼李主曰豈有此礼徐引椅少偏乃散坐後主相持相哭既生默不語忽長吁歎曰當時悔殺了潘佑李平鉉既出有旨再對詢

後主何言鉉不敢隱遂有秦王賜牽肌藥之事又後主在賜第七
夕命故妓作樂嚴聞于外太宗聞之大怒又傳小樓昨夜又東風
及一江春水東流句併坐之遂被禍云

記殘經

南臺古刹有佛書數百卷多唐季五代時所書字畫精勁歷歷可
喜按大藏經目凡五千四百卷今所存僅十一首尾可讀者又無
幾也阿含經四卷泰寧軍節度使齊克讓造正法華經一卷乾符
六年女弟子牛妙音書大理槃般若經共三十卷武寧軍節度使
朱友恭造友恭全忠養子李彥威也毗荼耶雜事一卷德妃伊氏
造唐莊宗次妃後有印章曰燕國夫人伊氏蓋未進封時所制也
其餘中斷橫裂虫謁鼠齧兩敗塵腐無復完綴想夫飄散蹂藉炷
燈拭紫補壞惟塞屋漏者又不勝其數也

李昭紀

輕賦

吳越錢氏賦歛無藝兩浙罹害及宋除吳越三衢江漢臣為鎮海
軍節度判官上十三州因籍於有司謂仍其舊是屬其民無已也
遂沉其籍於河坐是擯棄終身後命王方贊更定其賦畝稅一斗

民始聊生

異獸

太平興國九年嵐州獸一角似鹿無斑角端有肉性馴右散騎常
侍徐鉉等驗以為麟春秋曰麇身而有角者麟也春秋感精符曰
麟一角者明海內同一主也

至和 年交趾獻麟如牛而大通身皆大鱗首有一角攷之記傳
與麟不類當時有謂之山犀者然犀不言有鱗詔欲謂之麟則慮
夷獠見欺不謂之麟則未有以質之止謂之異獸今以予觀殆天

祿也按漢靈帝中平三年鑄天祿蝦蟆於平津門外注云天祿獸
名今鄧州南陽縣北宗資碑旁兩獸鑄其膊一曰天祿一曰辟邪
其獸有角鬣大鱗如手掌南豐曾阜為南陽令題宗資碑陰云二
獸膊之所刻燭製作精巧高七八尺尾鬣皆鱗甲莫知何象而名
此也今詳其形甚類交趾所獻異獸知其必天祿也 夢溪筆談
嘉祐三年六月丁卯交趾貢異獸二稱麒麟狀如牛身被肉甲鼻
端有角食生芻粟必先以杖擊其角始牛食樞密使田况辨其非
麟詔止稱異獸司馬光有賦

楊繼業

宋將楊繼業出代州攻遼耶律耶軫擒之初繼業至狼牙村心惡
之欲避不可得既禽三日死

手畢

宋子京郊別紙多曰伏承手畢南人謂筆為畢曰效之 黃山谷

官尼

宋初大臣家女多為尼如平章趙普女

右衛上將軍宋偓女開寶皇后妹也為比丘尼法名惠圓

制科

制科分五等虛一二等而以下三等取士終宋入三等五人吳育
蘓轍范百祿蘇軾雖入三等而為考官所駁復降四等李焘四等

梁灝

梁灝太宗雍熙二年廷試第一真宗景德元年以翰林學士知開
封府暴卒年四十二子固六進士第一至直史館年三十一 宋史
俗傳梁灝年八十二登第謝啟悞 談遷曰龍溪縣志林大年字
春卿年八十二以書義再領鄉荐謝啟有云減伏生之八歲加太

公之二年後不赴南宮郡延為州學正年九十薨矣日与生徒討論未見書終老于湖山

王昭遠

阜城王昭遠微時里祀里神昭遠適至有以博酪授之謂曰汝他日當有節鉞試擲以下之昭遠一擲六齒皆赤後歷天雄軍都部署知府事贈太尉謚惠和

玉等子

宣和殿有玉等子以五色玉次第排定凡玉至則以等之
鄱陽張世叔官游記聞

鄉舉

鄉舉初無定制仁宗治平以後始三歲一行皆從本州發解應試婺州士子多而解額溢三歲止解七人崇寧頒三舍法於學歲解

七人宣和五年復科舉三歲解十四人景定二年增解額三十名預選者為鄉貢進士其在漕司應試者解額頗寬士人往三舍鄉貢而度漕牒得預選者為漕貢進士又太學三舍生過科舉仍自發解預選者為國子進士此外復有隆興混試朱子曰今日倡為混補之說者多是溫福處婺之人而他州不與焉非獨婺州躁競而他州廉退也勢使之然耳蓋言解額之不均也時又有諫息免解而徑上禮部者然以上諸科赴禮部不第則並為常布而無斗祿之需
金華府志

古成之

廣州古成之居羅浮力學不倦登梁灝榜第二預聞之有張某嫉居其上召飲成之密置啞藥酒中比旦臚唱呼不能應上怒扶出或勸自明其事成之曰司命有定非人所能與也人服其量

腹兄

翰林學士李宗諤送從表兄詩呼為腹兄見弇州集不知何所據

呂蒙正

呂文穆微時於洛龍之龍門利涉院土室中與溫仲舒讀書今傳
破窰祖此也

三至堂

陳克佐三守廬州曰三至堂 楊洙淳化中守安慶天聖中子

為通判元豐間孫希元又守郡凡三至安慶 魏國太夫人陳氏

龍圖閣直學士從易之女內翰蘓紳之妻而丞相頌母也從易紳

頌皆嘗守杭夫人三至杭邱題邱柱曰吾幼從父至此中與吾夫

偕來今同吾兒凡三閱江山之勝

天子門生

贛縣王奇游京師真宗偶見其所作詩召見賜第奇作詩不拜春
官為座主親送天子作門生

同名了謂

晉公了謂當國惠安吳謂浩然文詞俊邁不肯避其名遂斥外終
屯田員外郎

葉武

邵武葉武子宏秘閣修撰善易學嘗曰易道莫大於時有二義
有在外之時有在我之時士君子出處須論在我之時然後論在
外之時

冠華柘枝舞

冠華公好柘枝舞會客必舞柘枝每舞必盡日時謂之柘枝顛鳳
翔有一老尼猶是華公時柘枝伎云當時尚有數十遍今日所舞

括 柘枝比當時十不得二三老尼尚能歌其曲好事者往往傳之 沈

